

PABOJA ETEHUE'YO EPESO CUIÑAJJI YASIJJE EFESIOS

*Pabohua tehue canaje Jesusaja epeejji
cuanaEpeso cuiñajjijo ba'e yasijje*

¹ Eya bajjani Pabo. Jesosa Quitoehua eya huoojea canaje oja sohui huohuiya. Jamaya Eyacuiñajji sa poanaje. Eyaya miquianaya Epeso cuiñajjijo ba'e yasijje esohui tehueaña. E'e, miquianaya Jesosa Quito nijje jjapeequiani. ² Eyacuiñajji esejaya Chii ai poani. Jesosa Quito esejaya Emeshi Mese nei oe nei. ¡Ohuaya miquianaya quea bei nee caba'e meesahua cahua! ¡Quea boejea capo mee cahua pea'ai!

*Jesosa eyajo ba'e jayojja jama eseya ba'e mee
caje'yo Eyacuiñajjiya*

³ Eyacuiñajji ca ca oe Jesosa Quitoja Chii poani. Jesosa esejaya Emeshi Mese nei poani. Eyacuiñajji ejjabihuiiqui jama ba'a: —Eyacuiñajji, miya quea pame nee nee poani.

E'e, ohuaya Jesosa huoojea canaje esejaya mimishi cuijea'yohua. Cuanaya ohuaya eseya ba'e tiitii mee caje'yo onijje eyajo. E'e, eseya o jayojjaya jama ba'e mee caje'yo quea pame nee eyajo. ⁴ Jiquio meshi pana jjimahuaajo Eyacuiñajji jjashahuabaquinaje jama ba'a: —Ojjaña cuana Jesosa nijje jjapeequiani ecue bacua cuana po

meeje'yo. Quea pame nee poaje. Mimishi'ama pea'ai poaje.

⁵ E'e, yahuajo nei nei eseya Eyacuiñajjija quea jea nee poanijo oya jjashahuabaquianaje jama ba'a: —Oya cuana ecue bacua cuana po meeje'yo, eba'ehuana jayojja ecue Bacua Jesosa Quito nijje jjapeequianijo.

E'e, jamaya Eyacuiñajji sa poanaje yahuajo nei nei. ⁶ Jamajjeya eseyaya oya bihuiaña jama ba'a: —Eyacuiñajji, miyaya ecuana jaahuana neineiaña.

E'e, Eyacuiñajjiya oja Bacua Jesosa quea jea nee nee acani. Eseyaya quea jea nee nee acanijo pea'ai Jesosa huoojea canaje mano'yohua, eseja mimishi cuijea'yojji. Jamatii, sosema' huoojea canaje. ⁷ Jamajjeya eseya cuaqui yasijje epoquijji pojjeama. E'e, jamaya poanaje Jesosa mano'yajo; ena' ojaya cuayaquinaje eseja mimishi cuana cuijea'yojji. E'e, eseya quea jea nee nee poanijo jamaya amee canaje Eyacuiñajjiya. Quea pame nee nee oya. Pea chama' o jayojja. ⁸ Quea pame nee nee ojaya ejjashahuabaqui'yojji. Ojaya eba ojjaña nei nei. Jamajjeya ohuaya eseya ba'e tiitii mee caje'yo onijje eyajo. ⁹ E'e, yahuajo nei nei esejaya ba jjima ojaya ejjashahuabaquijji. Jjeya ca ca ohuaya eseya ba meesahua cani ojaya ejjashahuabaquijji cuana Jesosa Quitojo. Jamaya ohuaya acaje'yo ba'a: Jesosa Quitohua esejaya mimishi cuana cuijea ca'yonajejo, Eyacuiñajjiya eseya ba'e tiitii mee caje'yo onijje eyajo Jesosa Quito poe o'oyajo. ¹⁰ E'e, quijje Eyacuiñajjiya Jesosa Quito Emeshi Mese nei oe nei po mee caje'yo. Ojjaña meshijo, ojjaña eyajo pea'ai huoo-

jeajji poaje'yo tii tii. Oya ojjaña quea bei po meejji poaje. Jama jjashahuabaquimeya poa Eyacuiñajji.

¹¹ E'e, yahuajo nei nei Eyacuiñajjiya eseya Jesosaja epeeji cuana babaca ca'ya poa Jesosaja epeeji epo'yoyji. Cuanaya Eyacuiñajji yahuajo nei nei meshi pana jjimahuajo jjashahuabaquinaje esejo jama ba'a: —Jesosaja epeeji cuana quijje nei ecuea ejjashahuabaqui'yoyji jayojja jama poaje'yo.

Jamajjeya Eyacuiñajjiya ojaya epeeji cuana quijje ojaya ejjashahuabaquijji jayojja jama amee caje'yo. ¹² Jamajjeya ecuaa, Jesosa Quitoja ebionei epeeji cuaa Eyacuiñajji bihuiaje jama ba'a: —Eyacuiñajji, miya quea pame nee nee poani, ecuaana Jesosaja epeeji po mee'yonaje.

¹³ Yahuajo Eyacuiñajji ecuanajo jjashahuabaquinaje, Jodio cuanajo. Jjeya oya miqüianajo, Jodio pojjeama cuanajo jjashahuabaquiani pea'ai. E'e, eyaya miqüiana huasijje Jesosa Quitoja esohui e'e nei huohuinaje Jodio pojjeama huasijje. Shajja'ajja majje miqüianaya Jesosa Quitoja epeeji poanaje. Jamajjeya Eyacuiñajjiya miqüianaya ojaya ebacua cuana po mee ca'yönaje. E'e, miqüianaaya shajja'ajjanaje Eyacuiñajjiya ejjashahuabaqui'yoyji quea pame nee miqüianajo jama ba'a: —Eyaya Jodio pojjeama cuana ba'e tiitii mee sa aña Jesosa nijje eyajo Jesosaja epeeji poanijo.

Cuanaya Eyacuiñajjiya yahuajo nei huohui ca poa jama ba'a: —Eyaya Edojjoshahua Pame huojjeaje'yo Jesosaja epeeji yasijje ona jaahuanaa. Oya cuana Jesosa nijje jjapee tiitiqui meesahua caje'yo —oya poa.

Jamajjeya esejaya eba jama ba'a: —E'e, Eyacuiñajjiya eseja jaahuana canijo ohuaya ojaya ejjashahuabaqui'yojji esejo jayojja jama acaje'yo e'e jojo nei —esejaya baña.

¹⁴ E'e, Eyacuiñajjiya yahuajo huohui ca poa jama ba'a: —Jodio pojjeama cuana ecuea epeeji poaje'yo beca cuana.

Eyacuiñajjiya jamaya huohui ca poa. Jamajjeya Jodio pojjeama cuana oja bacua cuana po mee caje'yo. Onijje ba'e tiitii mee caje'yo. Ojaya ebacua cuana po'yo majje ohuaya bihuia caje jama ba'a: —E'e Eyacuiñajji, miya quea pame nee poani e'e jojo nei.

Pabo miminaje Eyacuiñajji nijje Epesojo ba'e cuana quea pame nee epo mee'yojji

¹⁵ E'e, miqúanaya Eyacuiñajjiya epeeji poanaje. Peaa eya miqúanajo huohui canaje jama ba'a: —Beca cuana Epeso cuiñajjiyo ba'e Jesosaja, esejaya Emeshi Mese neija epeeji poanaje. Onaaya ojjaña Jesosaja epeeji cuana quea jea nee acani —eya acanaje cuaa.

¹⁶ Jamajjeya ohuaya miqúanaya oja bacua cuana po mee ca'yonaje shajja'ajja majje eya mimiani Eyacuiñajji nijje miqúanajo: —Eyacuiñajji, ¡miqua epeeji cuana Epesojo ba'e minijje jjapeequi meesahuacue quea pame nee!

¹⁷ E'e, eya mimiani Eyacuiñajji nijje miqúanajo jama ba'a: —Eyacuiñajji, miya Emeshi Mese nei Jesosa Quitoja Chii quea pame nee. Jamajjeya ¡miqua epeeji cuana Epesojo ba'e quea ja'a nee jjashahuabaqui meecue! ¡Oya cuana miqua ejjashahuabaqui'yojji, miqua esohui cuana pea'ai

ba meesahuacue! Jamajjeya onajaya eba nei nei miya poaje. ¹⁸ E'e Eyacuiñajji, ¡oya cuana ba meecue quea ja'a nee miquea ejjashahuabaquijji! E'e Eyacuiñajji, miyaya oya cuana babaca'yonaje; oya cuana ba'e tiitii meeje'yo Jesosa nijje eyajo. ¡Quea pame nee nee Jesosa nijje eba'ejji, de! ¡Maya oya cuana ba meesahuacue quea ja'a nee! E'e, jamaya miquea ejjashahuabaquijji miquea epeejji cuanajo. ¹⁹ Eyacuiñajji, miya quea ca'a nee nee poani; pea chama' mi jayojja quea ca'a nee nee. ¡E'e Eyacuiñajji, miya quea ca'a nee nee poanaje Jesosa Quito jaahuanajji! ¡Miquea epeejji cuana ba meesahuacue miya quea ca'a nee nee poani ecuana jaahuanajji pea'ai! —eya jamaya mimiani Eyacuiñajji nijje miquianajo.

²⁰ E'e jojo nei Eyacuiñajji quea ca'a nee nee. Jamajjeya Jesosa Quito dejja mase cuaa quecua ca'yajje mano'yajo, Eyacuiñajjiya shequi mee ca o'oya poa. Shequi mee'yo majje eyahuasijje dojosohuaqui ca'ya poa. Jomajo Eyacuiñajjiya Jesosa Quito onijje ojjaña huoojea'yojji po mee cani. ²¹ E'e, Jesosa oe nei quea ca'a nee nee po mee ca'yonaje. Oya ojjaña huoojea'yojji po mee ca'yonaje. Emeshi Mese oe nei po mee ca'yonaje pea'ai. E'e, Jesosa quea ca'a nee nee, quea pame nee nee yani jjeya; quijje aje oe oya ma ani tiitii'yome poaje. Oya quea bajjani huiso nee, quea pame nee nee poani Jesosa. ²² E'e, Eyacuiñajjiya Jesosa Quito Emeshi Mese quea ca'a nee nequi mee canaje. Ojjaña aquiana cuana Jesusaja poanaje. Ojjañaja oja epeejji cuanaja Emeshi Mese nei poanaje Jesosa. Eyacuiñajjiya huohui canaje jama ba'a: —¡Jesosa Quito shajja'ajjacue, ojjaña!

²³ E'e, Jesosaa ojaya epeeji cuana ojaya esohui jayojja jama ameesahua cani. Ojjaña ojaya epeeji cuana nijje nequi majje oya cuana ameesahua cani quea pame nee. E'e, ojaya epeeji cuana Jesosaja eyami jayojja jama poani.

2

Eyacuiñajjiya eseya eyajo ba'e tiitii mee caje'yo

¹ Yahuajo miqianaya quea mimishi nee nee poa jjejojo Eyacuiñajji nijje jjapeequi jjima poa. ² E'e, yahuajo miqianaya pea cuana quea mimishi jayojja jama Edosiquiana nijje jjapeequinaje, eshahua cuanaja mese nijje. Ohuaya shajjama' cuana quea mimishi po meesahua cani. ³ E'e ecuana, Jodio cuana miqiana jayojjaya poa. Eyacuiñajji jashajja'ajjaqui ajja pea'ai poa. Shajjama' jayojja jama po sa poanaje eshahuaja epeeji jayojjaya. E'e de, ecuanajaya ejjashahuabaquijji quea mimishi jayojja jama po sa poanaje. Jamajjeya yahuajo pishana ecuana, Jodio cuana, miqianaya Jodio pojjeama cuana pea'ai eshahuaja epeeji quea mimishi poanijo Eyacuiñajjiya huohui canaje jama ba'a: — Miquianaya aje oe quea nee nee po meeje'yo eyaya, eshahuaja epeeji quea mimishi nee neejojo —Eyacuiñajji poa.

⁴ Jamatii Eyacuiñajji eseya mimishijo jashahuabaqui tiitii sa po ajja eseya ojaya quea jea nee nee poanijo.

⁵ E'e, yahuajo pishana eseya Eyacuiñajji nijje jjapeequi jjima poa quea mimishi po sa neinei

poanijo. Jamatii Eyacuiñajjiya eseya oja bacua quea pame cuana po mee canaje Jesosaja epeeji poanijo. E'e de, jamaya Eyacuiñajjiya eseya quea jea nee acanijo esejaya mimishi cuana cuijea ca'yonaje. ⁶ Jamajjeya Jesosa Quitohua eseya mimishi cuana cuijea ca'yonajejo, Eyacuiñajjiya ecuana, miqianaya pea'ai ojaya bacua cuana po mee ca'yonaje ojee eyajo eba'e tiitii mee'yojji. Jamajjeya Eyacuiñajjiya ecuanaya, miqianaya pea'ai ba'e tiitii mee cani Jesosa Quito nijje eyajo. Jamaya ohuaya huohui ca poa ba'a: —Jesosaja epeeji poanijo eyaya miqianaya o jayojjaya nequi tiitii meeaña quea ca'a nee, quea pame nee pea'ai.

⁷ E'e, Eyacuiñajjiya esejaya mimishi cuijea'yo majje ese nijje quea bei poani. Jamajjeya ojjaña cuana esohuicuayajji ba mee cani; quijje pea'ai ba mee caje jama ba'a: —E'e nei eseya Jesosa Quitoja epeeji poanijo, Eyacuiñajji ese nijje quea bei poani. E'e, Eyacuiñajji ese nijje quea pame nee nee poani tii.

⁸ E'e de, eseya Eyacuiñajjiya quea jea nee nee. Jamajjeya miqianaaya huohuiña jama ba'a: —Ecuea eba Eyacuiñajjiya ecuea mimishi cuana cuijea ca'yonaje eya onijje jjapeequi jeahuajo —jamaya poanijo Eyacuiñajjiya miqianaya quea pame nee acani. E'e, ohuaya miqianajaya mimishi cuijea ca'yonaje onijje mimiyajo.

¿A'a miqianaya quea pame nee nee poani sosejje mimishi cuijea ca'yonaje? Chojja de, ohuaya mimishi cuana cuijea ca'yonaje sosema'. ⁹ E'e, ohuaya esejaya mimishi cuijea ca'yonaje sosema'. Jamajjeya pea cuana siajje epojji pojjeama jama

ba'a: —Eya quea pame nee poani sosejje Eyacuiñajjiya ecuea mimishi cuijea ca'yonaje —chojja, jamaya poani siajjepojji cuana.

¹⁰ E'e, esejaya eba Eyacuiñajjiya eseya pea jjashahuabaquime po mee ca'yonaje. Jamaya ohuaya aca'yonaje Jesusaja epeeji cuana poanijo. E'e, ohuaya jamaya aca'yonaje. Eseyo ojaya ejjashahuabaquiji jayojja jama atiitii mee ca'yani pea'ai. Ojaya ejjashahuabaquiji esejo jama ba'a: —¡Eya miqúanajaya quea jea neejo pea cuana quea pame nee atiitiicue!

Eyacuiñajjiya Jodio pojjeama sa cani ojaya epeeji epoiji

¹¹ Miquianaya Epesojo ba'e Jodio cuana pojjeama. ¡Jamajjeya jjashahuabaquicue! Miquianajaya chii cuana Jodo pojjeama poa. Jamajjeya Jodio cuana miqúanajo maimai aninaje jama ba'a: —Oya cuana ca ca oma Jodio pojjeama; Eyacuiñajjiya epeeji pojjeama.

E'e, Jodio cuana quea quehua jjashahuabaquinaje jama ba'a: Cuiishasha biso nei jehuissejjajeañajo ecuaa Eyacuiñajjiya epeeji quea pame nee poani poso ecuaa anaje, Jodio cuaa. ¹² Jamajjeya yahuajo Jesosa Eyacuiñajjiya huoojea'yo ojjaña jaahuanajji miqúanajaya ba jjima poa Jodio pojjeamaja jjejojo. Miquianaya Eyacuiñajji ba po jjima jjejojo Eyacuiñajji ba epo cuana nijje jjapeequi ajja poa. E'e, miqúanajaya Eyacuiñajji bihuia jjima Jodio cuana nijje. Yahuajo Eyacuiñajjiya huohui ca poa Jodio cuana jama ba'a: —Eyaya huoojeaje ojjaña jaahuanajji miqúanajaya huasijje —poanaje.

Maya miqúanajaya ba jjima poa Jodio pojjeamaja jjejojo. Jamajjeya miqúanaya jjashahuabaquinaje jama ba'a: —E'e de, ecuana jaahuanajji quea pame nee chama'. ¿Aya acuae ecuana jaahuana caje'yo? —poanaje.

E'e de, miqúanajaya Eyacuiñajji ba jjima poanaje. Jamajjeya ¿aya miqúanaya jaahuana canaje? Quea camaja eba'ejji mee nei jiquio meshijo. ¹³ Jjeya ca ca miqúanaya Eyacuiñajjija epeejji cuana poani Jesosa Quito nijje jjapeequianijo. E'e, yahujajo miqúanaya Eyacuiñajji bihuia po jjima poanaje. Jjeya ca ca Eyacuiñajjiya miqúanaya Jodio cuana jayojja jama amee canaje. E'e, jjeya miqúanaya Eyacuiñajji bihuiajji. Jesosa Quito miqúanajaya mimishi cuijea'yojji mano'yonaje, ojaya ena' cuayaqui'yonaje. Jamajjeya Eyacuiñajjiya miqúanaya oja bacua cuana po mee ca'yonaje.

Jodio cuana nijje Jodio pojjeama cuana ojee jjapeequije Eyacuiñajji nijje

¹⁴ E'e, Jesosa Quitohua ecuana ojaya epeejji po mee canajejo, beca Jodio cuaa Jodio pojjeamajo huohui cani jama ba'a: —E'e de, Jodio pojjeama cuaa Eyacuiñajji bihuia cani ecuaa jayojjaya Jesosaja epeejji poaniya jjejojo —poani.

E'e, Jodio cuana Jodio pojjeama cuana nijje Jesosaja epeejji poani jjejojo huapa pojjeama poani. Jjeya Jesosaja epeejji poani jjejojo Jodio cuanaja ejjashahuabaquiiji jayojja jama Jodio pojjeama cuana jjashahuabaquiani. Epeejji nei nei poanaje. E'e de, jamaya poanaje Jesosa Quito ojjañaja mimishi cuijea'yojji acui ecueata'apeejo

mano'yonajejo. ¹⁵ Ojjañaja mimishi cuijea'yojji poani jjejojo Jesosa ojaya epeeji cuana nijje miminaje jama ba'a: —¡Jodio etiiquianaja esohui jayojja jama a'a ajji ca ecuea epeeji epojji! Chojja, enijje jjapeequianijo Jodio cuana, Jodio pojjeama cuana pea'ai ecuea epeeji cuana poanaje. Ojjaña cuana huapa pojjeama cuana poanaje. Jamajjeya Jodio cuana Jodio pojjeama cuana nijje ojee jjapeequi meeje'yo quea bei —acanaje Jesosa Quitohua.

¹⁶ Jesosaa Jodio cuana, Jodio pojjeama cuana pea'ai ojaya epeeji cuana po mee ca'yonaje; oya cuana Eyacuiñajjija epeeji cuana poanaje. E'e, oya cuana Eyacuiñajjija bacua cuana poanijo, ojee nequi mee caje huapa pojjeama jayojja jama, quea bei. Jamaya amee canaje Jesosaa acui ecueata'apeejo mano'yo majje. ¹⁷ Cuanaya Jesosa Quito poeyanaje miquiana que, ma Jodio pojjeama huasijje jama huohuiya ba'a: —E'e de, jjeya miquianaya Eyacuiñajjija epeeji po meeaña. Yahuajo miquianajaya Eyacuiñajji ba jjima Jodio pojjeamaja jjejojo. Jjeya ca ca ojaya epeeji quea bei poani miquianaya —Jesosa poanaje.

Jesosa ecuana huasijje, ma Jodio cuana huasijje poeyanajeya Eyacuiñajjija esohui bajji yasijje. Ma ecua miquiaaya huohui canaje jayojjaya jama ecuaaya huohui canaje pea'ai. ¹⁸ Jamajjeya ecuana, Jodio bajjani cuana Eyacuiñajji nijje mimiani; miquianaya Jodio pojjeama cuana pea'ai Eyacuiñajji nijje mimije'yo, esejaya Chii ai nijje. E'e, Edojjoshahua Pame oe nei yani ojjaña Jesosaja epeeji cuana nijje. Ohuaya Jesosaja epeeji cuana Eyacuiñajji nijje mimi meesahua cani mete'ama.

¹⁹ Jamajoya jjeya Eyacuiñajjiya Jodio pojjeama cuana jama acani ba'a: —Yahuajo miquianaya ecuea epeeji pojjeamajo eyaya miquianaya jaahuana jjima poa. Jjeya ca ca miquianaya ecuea epeeji poani. Ecuea huapa pojjeama poani ecuea pea epeeji cuana nijjeya —acanjaje Eyacuiñajjiya. ²⁰ E'e, Jesusaja huoojea'yo cuanaja esohui shajja'ajjanaje miquianaaya. Cuanaya yahuajo nei Jodio esohui huohuiji cuaa esohui e'e nei huohui canaje. Maya jjeya miquianaaya shajja'ajjanaje. Jamajjeya miquianaya Jesusaja epeeji poanjaje pea'ai. Jamaya po mee canaje Jesusaa ba'a: Ojaya epeeji cuana equi jayojja jama nequi. Jesosa Quito ca ca quea ca'a nee, quea pame nee nee poani, equi yamajjana quea ca'a jayojja oya. E'e, jiquio ecua eyamajjanajo acui ejeasehuijaaji huana majje acui equecuaajeaji huisajo bequiobo ba'ehuana cani jayojja jama Jesusaa ojaya esohui huohuiji cuana quea pame nequi mee cani. Majoya esohui huohuijiya ojjaña Jesusaja epeeji cuana quea pame ba'e meesahua cani. Jesusaja huoojea'yo esohui huohuiji cuana, Jodioja esohui huohuiji cuana pea'ai ma acui eba'ehuanasohuajji jayojja jama poani. ²¹ Jjeya miquianaya Jesusaja epeeji po majje acui ejeasehuiji jaaji biajje nequi jayojja jama poani. Jamajjeya jiquio ecua equi yamajjana quea ca'a nequijo equi quea ca'a nequia mee cani jayojja jama Jesusaa quea ca'a poaniya ojaya epeeji cuana ojee quea ca'a onijje jjapeequi mee cani. Equi quea ca'a jayojja po mee cani. ²² E'e, jjeya miquianaya, Jodio pojjeama Jesosa Quitoja epeeji poanijo Edojjoshahua Pame ojjañajo nequi.

Jamajjeya ojaya epeejji Jodio bajjani cuana nijje ojee nequi, equi quea ca'a jayojja poani.

3

Pabohua esohui huohui majamaja canaje Jodio pojjeama cuanaja ebajji

¹ Eya Pabo, Jesosa Quitoja esohui huohuijji. Eyaya ojaya esohui huohuinaje miqiuana huasijje, Jodio pojjeama bajjani yasijje ojaya epeejji nei epo meejji. Jesosaja esohui huohuiañajo pea cuaa eya iña majje jeanobiajea ca'yonaje eya esohui ehuohui poaje jjejojo. ² Jamatii. Pea cuaa miqiuana huasijje huohuiqui canaje ejo jama ba'a: —Eyacuiñajjiya Pabo huoojea canaje ojaya esohui Jesosajo huohuiya Jodio pojjeama cuana huasijje —acanjaje.

³ Yahuaje miqiuanaajaya ba jjima Eyacuiñajjiya ejjashahuabaquijji jama ba'a: —Jesosa Quitohua ojjaña ojaya epeejji cuana, Jodio cuana, Jodio pojjeama cuana pea'ai ba'e tiitii mee caje'yo onijje eyajo.

Maya Eyacuiñajjiya eya ojaya epeejjijojo ba mee canaje. Jamaya ecuea esohui etehue'yo miqiuana huasijje yahuaje huohuia poa. ⁴ E'e, maya miqiuanaaya banaje. Jamajjeya jama jjashahuabaquime poanjaje ba'a: —E'e jojo nei Eyacuiñajjiya Pabo ba mee canaje ojaya ejjashahuabaquijji jama ba'a: Jesosa Quitohua ojjaña ojaya epeejji cuana, Jodio cuana, Jodio pojjeama cuana pea'ai ba'e tiitii mee caje'yo onijje eyajo —jamaya miqiuanaajaya eba poanjaje.

⁵ Yahuajo nei ca ca Eyacuiñajjiya pea cuana huasijje huohui jjima ojaya ejjashahuabaquijji Jesosa Quitojo, ma Jodio pojjeama cuana ojaya epeeji po mee majje o jaahuanajji poaje'yo pea'ai. Jjeya ca ca Eyacuiñajjiya Edojjoshahua Pame huoojea canaje ojaya epeeji cuana huasijje. Ojaya epeeji beca cuana huoojea canaje ojaya ejjashahuabaquijji jayojja jama huohuiya. Edojjoshahua Pameya ma esohui huohuiji cuana ba mee canaje Eyacuiñajjiya ejjashahuabaquijji Jodio pojjeamajo pea'ai.

⁶ Eyacuiñajji jjashahuabaquinaje Jodio pojjeama cuanajo jama ba'a: —Jodio pojjeama cuana ecuea epeeji po majje ecuea huapa pojjeama cuana poaje. Oya cuana ba'e tiitii meeje'yo eyajo Jesosa nijje. E'e nei, eyaya huohuinaje ecuea epeeji cuana Jodio bajjani cuana huasijje jayojja jamaya eyaya aje'yo ecuea epeeji Jodio pojjeama cuana huasijje pea'ai. Jamaya eyaya aje, oya cuana Jesusaja epeeji poanijo. E'e, Jodio pojjeama cuaa shajja'ajja canaje ecuea esohui Jesosa Quitojo —Eyacuiñajji poanaje.

⁷ E'e jojo nei Eyacuiñajjiya eya huoojea canaje ojaya esohui quea pame nee Jesusajo huohuiya. Eya ojaya quea jea poanajejo, ohuaya eya ojaya epeeji po mee ca'yonaje, eya ojaya esohui huohuiji po mee canaje pea'ai.

⁸ Jamajjeya Jesusaja pea epeeji cuana quea pame nee nee; eya ca ca quea pame pishana yahuajo Jesusaja epeeji cuana cuia mee'yojji poa jjejojo. Jamatii Jesosa nijje jjapeequiyajo, Eyacuiñajjiya eya huoojea canaje ojaya esohui huohuiya. E'e de, eya ojaya esohui huohuiji poanaje, esohui quea pame nee Jesosa

Quitojo ehuohuijji Jodio pojjeama cuana huasijje. Jamajjeya oya cuana ba meeje ache pame nee nee Eyacuiñajjija ejjashahuabaquijji onajo. E'e, jjeya oya cuana ba'e tiitii mee caje'yo eyajo Jesosaja epeeji poani jojoya. ⁹ Eyacuiñajjiya eya huoojea canaje ojjaña ojaya ejjashahuabaquijji ba meesahuaa, ma yahuajo ojjañaja ba jjima poa. Ecuea esohui shajja'ajja majje ojjaña ba caje jama ba'a: Ojjaña Jesosaja epeeji ojee ba'e tiitii mee caje'yo eyajo onijje e'e jojo nei jjapeequianijo, Jodio cuana, Jodio pojjeama cuana pea'ai. E'e, Eyacuiñajji quea ca'a nee nee. Oja pana'yo ojjaña, de. Yahuajo nei oya jjashahuabaquia poa ojjaña jaahuanajji. Jamatii ecuanajaya etiiquiana maya ejjashahuabaquijji ba mee jjima poa Eyacuiñajjija. ¹⁰ E'e, Eyacuiñajjiya eya huoojea canaje ojaya ejjashahuabaquijji huohuiya. Jamajoya ojjaña esohuidojojji mese cuaa, ojjaña pea cuana eyajo nequiya cahuhui cahua jama ba'a: —¡Bacue oe! Eyacuiñajji jjashahuabaquiani quea pame nee, quea ja'a nee nee. E'e, ohuaya ojjaña ojaya epeeji cuana onijje nequi tiitii mee cani eyajo — ojjanaa ca'a cahua.

¹¹ Jamaya Eyacuiñajji jjashahuabaquia poa yahuajo nei nei, jiquio meshi pana jjimahuajo. Ojaya ejjashahuabaquijji quea ja'a nee jayojja jama poanaje Jesosa Quito, esejaya Emeshi Mese nei. ¹² Jamajjeya jjeya eseya mimije'yo Eyacuiñajji nijje mete'ama Jesosa Quitoja epeeji po majje. ¹³ Jamajjeya eyaya miquianaya huohuiaña jama ba'a: —Miquiana huasijje Jesosaja esohui huohuiaña, pea cuaa eya jeanobiajea canaje eya miquiana huasijje esohui ehuohui poaje

jjejojo. Jamatii ja'a quea yeno pojji! Quea camaja ejeanobia ejaajji, de. Jamatii ecuea esohuijo miqúanaya Jesosaja epeeji poanaje.

Jesosa Quitohua eseya quea jea nee nee acani

¹⁴ Jamajjeya miqúanaya, Jodio pojjeama Jesosaja huapa pojjeama poanijo, eya Eyacuiñajji nijje mimiani miqúanajo. E'e, Eyacuiñajji esejaya Chii ai quea pame nee nijje eya mimiani jama ba'a: —Eyacuiñajji, miya quea pame nee nee —eya poani.

¹⁵ E'e, Eyacuiñajjiya pana ca poa ojjaña. Jesosaja epeeji jjeya eyajo nequi, ojjaña ojaya epeeji jiquiojo nequi pea'ai Eyacuiñajjiya bacua cuana poani. Etiqúiana ojaya epeeji cuana pea'ai Eyacuiñajjiya bacua cuana poa. ¹⁶ Jamajjeya eya oniije jama mimiani miqúanajo ba'a: —Eyacuiñajji, miya quea pame nee yani tii tii quea ca'a nee nee. Miyaya Edojjoshahua Pame huoojeanaje miquea epeeji cuana Epesojo ba'e yasijje quea ca'a po meeya. ¡Edojjoshahua Pameya miquea epeeji cuana caba'e meesahua cahua quea ja'a nee miquea esohui jayojja jama! ¹⁷ E'e Eyacuiñajji, miquea epeeji cuaa huohui cani jama ba'a: “Jesosa nijje ecuana jjapee tiitiqúiani”. Jamajjeya joya cuana Jesosa Quitoja ejjashahuabaqui'yojji jayojja jama jjashahuabaqui meesahuacue quea ja'a nee! ¡Jamaya acue Eyacuiñajji, miya quea ca'a nee poanijo! E'e, miquea ejjashahuabaqui-ji jama ba'a: “Ecuea epeeji cuana quea jea nee poani. Eyaya oya cuana quea ja'a nee ba'e meesahuaje ecuea ejjashahuabaqui-ji quea ja'a nee jayojja jama”. E'e Eyacuiñajji, quea jea nee nee

miquea epeeji cuana. ¡Maya miyaya oya cuana ba meesahuacue! Jamajjeya oya cuana mijo jama poani ba'a: “Eyacuiñajji ecuana quea jea nee nee poani. Ecuana jaahuana cani quea pame nee nee” oya cuana poani. ¹⁸ E'e Eyacuiñajji, ¡jamajjeya miquea epeeji cuana Epesojo ba'e, ojjaña miquea pea epeeji cuana pea'ai ba meesahuacue miquea ejjashahuabaquiji quea pame nee nee onajo poani! Jamaya miyaya ojjaña quea jea nee nee año. ¹⁹ E'e, oya cuana Jesosa Quitoja quea jea nee nee poanaje. Ojaya epeeji cuana po meesahua ca'yonaje. ¡Jamaya oya cuana ba meesahuacue, Eyacuiñajji! Quea jea nee nee miquea ojjaña. Ecuana ba meeme ajja. Jamatii jjashahuabaqui meeme ajja. E'e Eyacuiñajji, ¡miquea epeeji cuana ba meesahuacue miquea ejjashahuabaquiji quea ja'a nee onajo pea'ai! Quea huiso nee, de. Jamajjeya joya ecua miyaya huohuiaña jamaya acaje'yo cuaa quea pame nee. Onajaya ejjashahuabaquiji miquea jayojja jama poaje'yo.

²⁰ —E'e Eyacuiñajji, ecuaaya miya bihuiaña. Miya quea ca'a nee nee oe nei poani quea pame nee nee. Jamajjeya miquea ejjashahuabaquiji quea ja'a nee nee ecuanajo año, miyaya. E'e, quea pame nee nee ecuana jaahuanaña, miyaya. Quea pame nee nee miyaya año, Eyacuiñajji. E'e, ecuana jjapeequi meesahuaña minijje miya quea ca'a nee nee poanijo. Jamaya apoa —jamaya eya mimiani Eyacuiñajji nijje miqianajo.

²¹ Jamajjeya ¡eseyaya ojjaña Jesusaja epeeji cuaa Eyacuiñajji ejjabihuia tiitiqui'yo! Oya quea pame nee nee.

4

¡Ojee ejjachacoqui ojjaña quea bihui ba'yaninya!

¹ E'e, eyaya, Pabohua Emeshi Mese neija esohui huohuiañajo, pea cuaa eya jeanobiajea canaje eya esohui ehuohui poaje jjejojo. Jamajjeya ¡ecuea esohui shajja'ajjacue! Jjeya miquianajaya eba Eyacuiñajiji ejjashahuabaquijji miquianajo; ohuaya miquianaya babaca canaje onijje quea ja'a nee nee ejjapeequijji. Jamajjeya ¡jamaya ba'ecue ojaya epeeji nei! ² ¡Jesosaja epeeji cuana quea bei pocue! ¡A'a quea mase pojji pea cuana nijje! ¡A'a tecueacuajijji! Minijje quea mimishi poajo, ¡jamatii oya cuana quea jea nee acue! ³ E'e, Edojjoshahua Pameya Jesosaja epeeji cuana ojee jjapeequi meesahua cani quea bei. Jamajjeya ¡miquianaaya ojjaña jamaya atiitiicue pea'ai! ⁴ ¡Bacue! Ojjaña eseya Jesosaja epeeji cuana Jesosaja eyami jayojja jama poani, oe eyami jayojja poani. ¡Bacue! Edojjoshahua Pame oe nei esejo yani, ojjaña Jesosaja epeeji cuanajo. Eyacuiñajiji eseya babaca cajje ojaya oe nei ejjashahuabaquijji ojjañajo jjashahuabaqui mee canaje jama ba'a: — Ecuea epeeji cuana ba'e tiitii meeje'yo Jesosa nijje eyajo —poanaje.

⁵ Esejaya Emeshi Mese nei oe nei yani. Jesosaja esohui e'e nei nei oe nei yani, pea chama'. Onaaya eseya besa mee canaje enajo ojjañaja ebajji eseya Jesosa Quito oe nei nijje jjapeequiani. ⁶ Oe Eyacuiñajiji yani tii tii; pea chama'. Oya oe nei ojjañaja Chii ai. Oya ca ca oe ojjaña huoojeajji. Ojjaña ameesahua cani de, ojjaña nijje nequi pea'ai.

Jamajjeya ¡Jesosaja epeeji cuana nijjeya oe quea bei nee jjapeequicue miquianaya!

⁷ E'e. Jamajjeya Eyacuiñajjiya ojjaña Jesusaja epeeji cuana chaco meesahua cani onijje. Oe epeeji chaco meesahua cani iye huiso; pea chaco meesahua cani quea huiso, esohui huohuijji pojja'a, pea echacojjiijo pojja'a. ⁸ Jamajjeya Eyacuiñajjiya yahuajo nei jama tehueme aca poa Jesusajo ba'a:

“Eyahuasijje sohuaqui'yo majje ohuaya quea huiso dejja cuana onijje jjapeequi meesahua caje'yo. Ohuaya ojaya epeeji cuana onijje chaco meesahua caje pea'ai”.

Jamaya tehue mee ca poa yahuajo nei nei Jesosa Quitojo.

⁹ ¿Yajjajje acuae yahuajo nei tehue ca poa? Jama ba'a: “Eyahuasijje sohuaqui'yonaje”. Jama poanijo ba'a: Ebionei Jesosa eyajo ani meshi yasi-jje poeyanaje. ¹⁰ Meshi yasijje poe majje eyahuasi-jje poqui o'oyanaje. Jomajo oya quea ca'a nee nee nequi tiitiije'yo, ojjaña huoojea'yojji epojji tii tii, Emeshi Mese nei epo'yojji. ¹¹ Jesusaa ojaya epeeji cuana onijje chaco meesahua cani jama ba'a: Beca cuana ohuaya huoojea canaje ojaya esohui huohuiya. Beca cuana huohui meesahua cani ma ohua quiije acaje'yo. Pea cuana huohui meesahua cani ojaya esohui quea ja'a nee nee. Pea cuana ca ojaya epeeji jaahuanajji po mee cani. Pea ca esohui huohuijji po meesahua cani ojaya epeeji cuana quea huiso ojaya esohui eba meesahuajji. ¹² Jamaya Jesusaa ameesahua cani ojjaña ojaya echacojji quea pame nee epojji. Jama-

jjeya ojjaña ojaya epeeji cuana quea ja'a nee nee eba'e poquiji.

¹³ Jamajjeya eseya Eyacuiñajjija Bacua Jesusaja epeeji cuana ojee jjapeequije ojaya esohui jayojja jama. Ojjaña eseyaya oya ba neinei'e'yo pea'ai. Jamaya eseya ojaya epeeji cuana quea ja'a nee poaje. O jayojja jjashahuabaquime poaje, epeeji etii jayojja poaje. ¹⁴ Jjeya nei jjapeequiani jayojja jama pojjeama eseya poaje. E'e, jiquio ecua beniya enashajo dojo cani pea mijijje jayojja jama esohui huohuiji nisho cuaa joya jjeya nei Jesosa nijje jjapeequiani dasia majje poquiquehua mee cani. Oya cuana jjashahuaba majamajaquiani ese dasiajji. ¹⁵ Eseyaya ca ca pea cuana quea jea poanijo esohui e'e jojo nei huohuiaña Jesosa, esejaya Emeshi Mese nei jayojja jjashahuabaquime epojji. ¹⁶ ¡Bacue! Dejjaja eyami: eme', equise, ojjaña ojaya ejjashahuabaquiji jayojja jama ojee quea pame poanijo quea ja'a nee nequi dejja. Jiquio ecua dejjaja eyami jayojja jama Jesusaja epeeji cuaa ojee chaco cani quea pame nee, Jesusaja ejjashahuabaquiji jama. E'e, ohuaya ojjaña ojaya epeeji huoojeajji poaniya ojee chaco mee cani onijje. ¡Jamajjeya ojjaña quea jea nee acue cuana! ¡Onaya jjapeequi meesahuacue!

Pea ba'e'yome epojji Jesosa Quito nijje

¹⁷ Eya, Pabo Jesusaa huoojea ca'yonaje miqiana huasijje esohui huohuiya. Jamajjeya ¡ecuea esohui shajja'ajjacue! ¡Jesusaja epeeji pojjeama cuana quea mimishi jama a'a pojji! Ojaya ejjashahuabaquiji cuana cajaa. ¹⁸ E'e, oya cuana quea mimishi jjashahuabaquiani.

Pea eba'ejjijo jjabahuejjaqui ajja. Jjapeequi ajja Jesosa nijje. Shajjama' de, mimishi quea boti nee ojaya. ¹⁹ Mimishi cuanajo bicho'ama. Quea tai nee nee atiitii cani. Quea mimishi tii tii po sa neinei poani, de. ²⁰ Miquianaaya ca ca Jesusaja esohui shajja'ajjanaje. Jamajjeya ¡ba'ecue quea pame nee! ²¹ ¿A'a miquianaaya Jesusaja esohui shajja'ajjanaje? E'e. ¿A'a jjabahuejjaquinaje? E'e. Ojaya esohui ca ca oe e'e jojo nei poani. ²² Jama poanaje ba'a:

—¡Ma mi ba'ya poa quea tai Jesosa Quito ba jjimahuajo pajea neinei'yocue! ¡Cajaa acue! Quea mimishi jjashahuaba tiitiiqui aninajejo beshahua nei miya poquinaje cuaqui yasijje. ²³ ¡Eyacuiñajjiya miquianaya quea pame nee cajjashahuabaqui mee cahua Jesusaja ejjashahuabaquijji! ²⁴ Eyacuiñajjiya miquianaya ba'e mee caje o jayojja. Jamaya e'e jojo nei quea pame nee eba'ejji. Jamajjeya ¡ba'ecue Eyacuiñajjiya ejjashahuabaquijji jayojja jama!

²⁵ Eseyá Jesosa nijje jjapeequi majje huapa pojjeama cuana poani. Jamajjeya ¡a'a onaya siajje ajji! ¡Ojjaña Jesusaja epeeji cuana nijje e'e nei mimicue! ²⁶ ¡Miquianaya onaja mimishijo a'a quea quene po tiitijji! ¡Jjeyahua nei oe quea bei nee po o'oyacue! ²⁷ Quea quene po tiitianiyo, Edosiquiaa miquianaya dasia ca chana'. Quea mimishi, quea mimijjequijjea po mee ca o'oya chana', de. ²⁸ Jamajjeya miya siipojji ¡sii popajea'yocue! ¡Quea pame oe chaco neineicue! Jamaya eba'ejji quea pame poaje miquea quea huiso, aema' ba'e meesahuajji pea'ai.

29 ¡A'a quea mimishi mimijji pea'ai! ¡Esohui quea pame nee mimi tiitiicue pea cuana jjapeequi meesahuajji! Jamajjeya pea cuana miquea esohui shajja'ajja majje quea pame poaje. 30 Cuanaya Jesosaja epeeji quea mimishi po o'oyajo, Edojjoshahua Pame quea yeno poani. ¡A'a oya quea yeno po meeji! E'e, Eyacuiñajjiya ese quea boejea po mee'yo majje Edojjoshahua Pame huoojea canaje ese nijje nequiya. Jamajjeya Jesosa Quito poe o'oyajo Edojjoshahua Pameya huohui caje esejo jama ba'a: —Oya cuana Jesosaja epeeji nei —poaje.

31 Jamajjeya ¡a'a mimijajijji! ¡A'a quea quene pojji! ¡A'a quea tecue pojji! ¡A'a jjaniñebaquijji! ¡A'a jjamimicuiajea nobiajeaquijji pea'ai! Chojja, ¡ojjaña mimishi cuana pajea neinei'yocue! 32 ¡Pea cuana oe ba'e sahuacue quea pame nee! ¡Quea jea nee acue! Pea cuaa miya ñiñeba canijo, napa canijo pea'ai ¡onijje quea bei pocue! E'e, Jesosa Quito miquea mimishijo mano'yajo, Eyacuiñajjiya miquea mimishi cuana cuijea ca'yonaje, quea quene po tiiti ajja mimishijo. ¡Jamaya acue miqianaaya, ojjaña!

5

Jesosaja epeeji, ¡ojaya esohui jayojja jama acue!

1 Eyacuiñajjiya miqianaya quea jea nee acani, oja bacua cuana. Jamajjeya ¡o jayojja jama pocue miqiana ojaya epeeji cuana poanijo! 2 Jesosa Quito ese cuanajo mano'yonaje oya quea ese jea nee poanijo. Eyacuiñajji quea bihui nee poanaje oja Bacua Ejja esejo mano'yajo. E'e,

yahuajo nei Jodio cuaa huichacha quea shiye nee nee ba'esohuaqui mee ca poa Eyacuiñajji bi-huiajji. Ma jayojjaya Jesosa mano'yonaje esejaya mimishijo. Jamajjeya ipea cuana quea jea nee acue miqianaaya, Jesosa Quitohua jayojja jama acue! ³ Jamajjeya miqianaya ojaya epeeji poanijo ¡Jesosa jama pocue! ¡A'a quea mimishi jashahuabaquijji! ¡Mimishijo oe a'a mimijji pea'ai! ¡Quea mimishi a'a pojji! E'e, ¡a'a shacuima' nequi, ahuema'ani pea'ai, onajaya yahue, ehuanase pea'ai a'a siijji! ¡A'a quea dejja tai pojji! ¡A'a quea nishehui pojji pea'ai! ⁴ ¡Esohui quea tai a'a mimijji pea'ai! ¡Shajjama' jayojja a'a mimijji! ¡Quea mimishi, quea mimijjequijea a'a mimijji! Jamaya quea tai. ¡Quea bihui nee ca ca Eyacuiñajji nijje mimicue! ⁵ ¡Bacue oe! Pea cojjoji, dejja quea tai pea'ai, quea aquiana nahuejo epana'yo bi-huiajji jayojja poani pea'ai eyahuasijje edobiquijji pojjeama. Jesosa Quito nijje, Eyacuiñajji nijje pea'ai eba'ejji pojjeama eyajo, Jesosa ojjaña huoojeajji poanijo. Chama' dejja mimishija eba'ejji yajji eyajo. ⁶ Siajjepojji cuaa miya ba'e mee ca chana' quea mimishi. ¡Oya cuana a'a shajja'ajjajji! Mimishi acanijo, shajjama' poanijo pea'ai Eyacuiñajjiya quea nee tii tii po mee caje'yo e'e jojo nei. ⁷ Jamajjeya ¡a'a mimishi cuana nijje jjapeequijji!

⁸ Yahuajo miqianaya quea mimishi ba'ya poa pea'ai. Jjeya ca ca miya Jesusaja epeeji cuana poanijo ejiojji quea ja'ajje onijje poquiani. Jama-jjeya ¡Jesusaja esohui jayojja jama quea ja'a nee acue! ⁹ E'e, Jesosa nijje jjapeequianijo ojjaña quea pame nee eseyaya ña. Jjashahuabaquiani

quea ja'a nee pea'ai. Esohui e'e nei jayojja jama ba'yani pea'ai. ¹⁰ Quea pame nee eseya añajo, Eyacuiñajji quea bihui nee poani. Jamajjeya ijashahuabaquicue Eyacuiñajji quea bihui nee epo meeji! ¹¹ Jamajjeya shajjama' cuana quea mimishi poanijo, ñonijje a'a quea mimishi pojji! ¡Oya cuana tecueacue jama ba'a: —Jamaya quea tai. ¡A'a quea mimishi pojji! —acue!

¹² Ohuaya quehuajje mimishi quea tai nee nee acani. ¡A'a mimishi cuanajo mimimimijji! ¡Cajaa acue! ¹³ Jesosaa shajjama' cuana jjabahuejjaqui meesahua cani; jama poani ba'a: —Coma ca quea tai; ¡a'a jamaya pojji! ¡Quea pame nee acue!

¹⁴ Jiquio ecua cuaquijjiya mecajje ojjaña jeaja'a cani jayojja jama Jesosa Quitohua shajjama' cuana mimishi pajea mee'yo majje quea ja'a ba'e meesahua cani. Jamajjeya yahuajo nei nei jama sohuicuayame poa cuana ba'a:

“Shajjama' cuana, ijashajja'ajjaquicue! ¡Eshahua nijje popajea'yocue! Quitohua miya quea ja'a nee ba'e meesahua caje'yo”.

Jamaya aca poa yahuajo nei nei.

¹⁵ Jamajjeya ijashahuaba neinei quicue quea ja'a nee eba'eji! ¡Shajjama' cuana jayojja jama a'a ba'eji! ¡Jesosaja esohui jayojja jama ba'ecue! ¹⁶ E'e, ijjea janobajjima nei chaco chaco tiiticue quea ja'a nee Jesosa Quitojo! Jjeya aje oe quea camaja, quea huiso cuana quea mimishi poani. ¹⁷ Jamajjeya ¡a'a shajjama' pojji! Eyacuiñajjiya miya sa cani ojaya echacojji epojji. Jamajjeya oya huohui'ajjacue jama ba'a: —Eyacuiñajji, ¿a'ya cuae eya miyaya chaco meeje so'o?

18 ¡A'a jja oe huoojji! Chojja, ishi'ishianijo miquianaya quea tai nee poaje'yo. ¡Edojjoshahua Pameja esohui miquiana nijje jama acue!
 19 ¡Jamaya esohui quea pame nee Eyacuiñajji mimicue! Jama acue ba'a: —Cua'a. ¡Eyacuiñajji nijje esohuicuaya!

E'e, Edojjoshahua Pameya sohuicuaya mee caniya ¡quea bihui nee Eyacuiñajji bihuiaque sohuicuayanijo! 20 Cuanaya Jesosa Quito esejaya Emeshi Mese nei poanijo, ¡Eyacuiñajji, esejaya Chii ai bihuiaque jama ba'a: —E'e Eyacuiñajji, jamaya. Miyaya quea pame nee atiitiaña —acue!

Ehuohuijji yahue cuana huasijje, ehuanase cuana huasijje pea'ai

21 ¡Jiquio pea esohui bacue! Jama ba'a: Jesosa Quitoja esohui shajja'ajjajji poanijo ¡ba'ecue quea bei nee miquea huapa pojjeama cuana nijje!

22 Ehuanase cuana, ¡shajja'ajjacue mo! Miquiana Jesusaja epeejji poanijo ¡miquea yahue shajja'ajjacue oe! 23 E'e, Jesosa Quito Emeshi Mese nei oe nei poanijo, ojaya esohui shajja'ajja cani ojaya epeejji cuaa. Jamaya miquea yahue mi huoojeajji poani pea'ai. ¡Oya shajja'ajjacue! Cuanaya Jesusaa ojaya epeejji cuana jaahuana cani quea pame nee. Jesusaa jayojjaya yahue cuaa ehuanase cajaanahuana cahua pea'ai. 24 Jesosa Quitoja epeejji e'e jojo nei cuaa ojaya esohui jayojja jama atiitii cani. Jamaya ehuanase cuaa, ¡miquea yahue shajja'ajja tiitiicue!

25 Yahue cuana, ¡shajja'ajjacue mo pea'ai! Jesosa Quito ojaya epeejji cuana quea jea nee poanijo mano'yonaje onaja mimishi cuijea'yojji. Jamaya

yahue cuaa, ¡miquea ehuanase quea jea nee acue!
¡Quea ja'a nee jaahuanacue! ²⁶ E'e, Jesosa Quito
ojaya epeeji cuana mimishi cuijea'yo majje Ey-
acuiñajji nijje miminaje jama ba'a: —Jiquio cuaa
ecuea esohui shajja'ajja canaje. Peaa oya cuana
besa mee canaje mijo pea'ai —poanaje.

²⁷ Jamaya poanaje Jesosa, ojaya epeeji e'e jojo
nei cuana quea pame nee nee epo meeji ba'a:
mimishi'ama, quea tai pojjeama, quea ja'a nee nee
epo meeji. ²⁸ Jamajoya yahue cuaa, ¡miquea ehua-
nase ba'e meesahuacue! E'e, miya quea pame ba'e
sa poanijo ¡miquea ehuanase ba'e meesahuacue
quea pame! Ehuanase ba'e meesahuañajo miya
quea pame ba'eje pea'ai. ²⁹ E'e, dejja cuana quea
nee nee nequi sa po ajja. Chojja. Bobi, daqui pea'ai
sa'ajja cani quea pame eba'eji. Quiajjaya Jesosaa
jaahuana cani ojaya epeeji cuana. ³⁰ Jamaya oya
poani eseya ojaya eyami jayojja nei nei poanijo.
³¹ Jamajjeya Eyacuiñajjija esohui yahuaajo nei ete-
hue'yo jama poa ba'a:

“Joya. Yahue ojaya ehuanase nijje ba'yanijo oya
cuana oe nei poani, beca pojjeama. Jamaya
oya cuana ba cani Eyacuiñajjiya. Jamajjeya
yahueya ojaya ehuanase oe nei cajaahuana
cahua quea pame nee. Quea jea nee nee
ca'a cahua; oja chii, oja enaese quea jea
pishana ca'a cahua”.

Jamaya yahuaajo nei Eyacuiñajjiya tehue mee ca
poa.

³² Eyacuiñajjija esohui quea pame nee nee yani
Quitotojo, ojaya epeeji cuanaajo pea'ai jama ba'a:
Jesosa Quito ojaya epeeji cuana nijje oe nei

jayojja poani, quea huiso pojjeama, oya jayojja jjashahuabaquime poani pea'ai. Jamaya Eyacuiñajjiya oya cuana ba cani oe nei jayojja. ³³ Oya jayojjaya yahueya, miya quea pame nee ba'e sa poanijo ¡miquea ehuanase quea jea nee nee acue! ¡Ba'e meesahuacue quea pame nee! Ehuanaseya, ¡miquea yahue shajja'ajjacue oe!

6

Ehuohuijji esho'i cuana huasijje echii mese cuana huasijje pea'ai

¹ Esho'i cuana, miya Emeshi Mese neija, Jesusaja epeeji poanijo ¡shajja'ajjacue miquee chii, miquea enaese pea'ai! Jamaya quea pame. E'e, Eyacuiñajjiya jama aca poa ba'a:

² “¡Miquee chiiya, miquea enaeseya pea'ai huohui cani jayojja jama acue! ³ Jamajjeya eyaya miquianaya ba'e meeje quea bihui nee, quea pame nee. Quea huiso shequiaja ba'e meeje”.

Jamaya Eyacuiñajjiya huohui ca poa.

⁴ Echii meseya, enaeseya pea'ai, ¡miquea ebacua cuana jaahuanacue quea pame nee! ¡A'a onijje quea tecue nee pojji! ¡A'a quea quene nee po meeji! ¡Oya cuana huohuicue Emeshi Mese neija, Jesusaja esohui! ¡Miquea esohui shajja'ajja meecue!

Ehuohuijji echacojji cuana huasijje echaco meeji cuana huasijje pea'ai

⁵ Echacojji cuana, ¡miquea echacomeejjija esohui jayojja jama pocue! ¡Chacocue quea pame nee ojaya! Jamajjeya Jesosa miquianajo quea bihui

nee poaje. ⁶ Miya chacochoacoani quea pame nee miquea echaco meejiya ba canijo o quea bihui po meeji. ¡Ojaya ba jjimajo a'a quea huea poiji! ¡Chacocue quea pame nee Jesosa Quitohua miya ba canijo! Jesosa miquea echacomeeji poani. ⁷ E'e, ¡miquea echacomeejiijo chacocue quea bihui nee! Pea cuanaja yajjiijo quea pame chacochoacoanijo Jesosa quea bihui nee po mee aña miyaya. ⁸ E'e, ¡jiquio esohui shajja'ajjacue! Beca cuaa chaco cani ojaya echacomeejiijo. Pea cuanaja echacomeejii chama'. Quea pame nee chacochoacoanijo Emeshi Mese neiya, Jesusaa ojjaña sosequia caje'yo quijje eyajo.

⁹ Echacomeejii cuaa, ¡sosequiacue miquea echacoji cuana ma ona chacochoaconaje soseje! ¡A'a quea mete po meeji! ¡A'a tecuea neineiiji! Echaco meejiija Emeshi Mese nei yani eyajo. Echacojiija Emeshi Mese nei yani eyajo pea'ai, Jesosa bajjani. Eyacuiñajji mijo jjashahuabaquiani jayojja jama ojjaña cuanajo jjashahuabaquiani pea'ai. Quea pame nee chacoñajo, ojjaña sosequia caje'yo quijje eyajo, echacoji, echacomeejii pea'ai.

Eyacuiñajjiya eseya quea ca'a nee po mee cani

¹⁰ ¡Pea esohui shajja'ajjacue! ¡Japee neineiquicue Jesosa nijje! Jamajjeya ohuaya miquianaya ojaya epeeji quea ca'a po mee caje'yo. Oya quea ca'a nee nee poanijo miquianaya quea ca'a po mee caje'yo pea'ai. ¹¹ Eyacuiñajji nijje mimicue pea'ai jama ba'a: —Eyacuiñajji, ¡eya miquea ejjashahuabaquiji jayojja jama ameesahuacue quea ja'a nee!

Jamajjeya ohuaya miquianaya Edosiquiana nei, Satanasa bajjani jeabichajea mee caje'yo, ohua dasia sa acanijo. ¹² Pea cuaa quea mase cuaa ecuana Jesosa nijje jjapeequi pajea mee'yo sa acani. Oya cuana dejja pojjeama, Edosiquiana, eshahua cuana pea'ai. Jjeya quea camaja eshahuaja epeeji cuanaa quea tai acanijo. E'e, eshahua cuaa huoojea cani ojaya epeeji cuana, ojjaña quea mimishi poani pea'ai ecuana dasiaa nisho, ecuana jeabichajeaa nisho pea'ai. ¹³ Jamajjeya ¡Eyacuiñajji nijje mimicue jama ba'a: —Eyacuiñajji, jeya miquea ejjashahuabaquijji cuana jayojja jama ameesahuacue! —jamaya acue!

Jamajjeya eshahuaa jeabichajea sa acanijo, miquianaya quea ca'a poaje; eshahua jeabichajeaje'yo Eyacuiñajjiya miya asahua canijo. E'e, Eyacuiñajjiya miquianaya ojaya epeeji quea ca'a po mee caje'yo. ¹⁴ ¡Quea ja'a nee jjashahuabaquicue! ¡Esohui e'e nei ba neineicue! Jiquio ecua Shomano sohuinanohua ejjacomayijjiqijji yii cani ejjaquecuaquijji jama jayojja ¡esohui e'e nei ba neineicue quea ja'a nee epojji! Cuanaya sohuinanohua baa daqui quea moo ese'ojje huosho cani onaa equecua'yo poani jjejojo jama jayojja ¡quea ja'a nee, mimishi'ama ba'ecue eshahuaa napa cajje miya ejjadasia meequijji pojjeama! ¹⁵ Jiquio ecua ejiojji shejee, sapato, sohuinanohua huosho cani acuishajo mete'ama epojji jayojja jama ¡Eyacuiñajjiya esohui ba neineicue mete'ama esohui huohuijji! ¹⁶ ¡Eyacuiñajjiya esohui jayojja jama atiitiicue pea'ai! Jiquio ecua sohuinanohua copocopo

baa emejo huosho cani ejjaqueyaquijji, iña cani ejjaquecuaquijji, emeje edahua huo'ohuo'o icui nequiñajji jayojja jama ¡Eyacuiñajjija esohui jayojja jama atiitiicue Edosiquianaya miya edasiaajji pojjeama! ¹⁷ Cuanaya jiquio ecua sohuinanohua ejaahuojja ca'a, baajee sapa iya cani jama onaja sapa jaja jjima yajji jayojja jama ¡esohui esapajo huanacue miquianaya quea tai ejjashahuabaqui meejji pojjeama eshahuaja, Jesusaja epeeji nei poanijo! Jamaya pea'ai jiquio ecua sohuinanohua baa se beca iña cani pea jajajeabichajeajji jama jayojjaya ¡Eyacuiñajjija esohui mimicue eshahua mimicuiajejanobiajeajji, Edojjoshahua Pameya ameesahua canijo! ¹⁸ Jamajjeya ¡Eyacuiñajji nijje mimicue jama ba'a: —Eyacuiñajji, ¡eya miquea epeeji quea ca'a nee mo po meecue eshahua cuana, eshahuaja epeeji cuana pea'ai mimicuiajejanobiajeajji! ¡Edojjoshahua Pame huoojeacue minijje emimi tiitii meesahuajji! —jamaya oe acue!

Jamajjeya ¡jjashahuaba neineiquicue quea ja'a nee! ¡A'a Jesusa nijje jjapeequi pajea'yojji! ¡Ojjaña Jesusaja epeeji cuanajo mimi huicha'ahuicha'acue jama ba'a: —Eyacuiñajji, ¡ojjaña Jesusaja epeeji cuana jaahuanacue! ¡Quea ja'a nee po meecue! —jamaya acue!

¹⁹ Jamajjeya Eyacuiñajji nijje mimicue ejo jama ba'a: —Eyacuiñajji, Pabo miquea esohui huohui canijo ¡huohui meesahuacue mete'ama! Oya huohui meesahuacue, Eyacuiñajji, jama ba'a: “Jesusaa Jodio pojjeama cuana ojaya epeeji po mee cani onijje eba'e tiitii'yojji eyajo. Maya yahuajo onajaya ba jjima” —jamaya mimicue Eyacuiñajji nijje

ejo.

²⁰ E'e, Eyacuiñajjiya eya huoojea canaje Jesusaja esohui huohuiya. Ma esohui quea pame nee huohuiañajo, dejja quea mase cuaa eya iña majje jeanobiajea canaje. Jamajjeya ¡Eyacuiñajji nijje mimicue ejo esohui quea pame nee Jesusajo mete'ama ehuhui meesahuajji!

Pabo mimiani Eyacuiñajji nijje ojjaña Epesojo ba'e jaahuanajji

²¹ ¡Pea esohui bacue! Dejja bajjani Tiquico yani ecuana nijje. Oya ecuanaja quea jea nee nee, ecuea epeeji nei nei. Ohuaya ecuana Jesusaja esohui huohui sahua cani. Miquiana huasijje poqui majje ohuaya huohui caje ejo, ma eya aña jayojjaya huohui caje'yo pea'ai. ²² E'e, eyaya oya huoojeaña miquiana huasijje ecuanajo huohuiya. Oya shajja'ajja majje miquianaya yeno'ama poaje ecuanajo.

²³ Eya quea huiso mimiani Eyacuiñajji nijje miquianajo jama ba'a: —Eyacuiñajji, miya ecuanaja Chii ai. Jesosa Quito, miya ecuanaja Emeshi Mese nei. ¡Ojjaña miquea epeeji cuana Epesojo ba'e quea bei nee po meecue! ¡Oya cuana ojjaña miquea epeeji cuana quea jea nee po meesahuacue! ¡Oya cuana miquea esohui jayojja jama ba'e meesahuacue quea ja'a nee pea'ai! — jamaya eya poani.

²⁴ Jamajjeya esejaya Emeshi Mese nei Jesosa Quito quea jea tii tii poanijo, ¡Eyacuiñajjiya miquianaya caba'e meesahua cahua!

Mahuiso ecuea esohui. Eyaya Pabo bajjaniya esohui tehuejyonaje. Apoa.

Eyacuiñajjija Esohui **New Testament in Ese Ejja (BL:ese:Ese Ejja)**

copyright © 2012 Wycliffe Bible Translators, Inc.

Language: Ese Ejja

Translation by: Wycliffe Bible Translators, Inc.

Ese Ejja [ese], Bolivia

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ese Ejja

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-23

PDF generated using Haiola and XeLaTeX on 11 Nov 2022 from source files
dated 29 Jan 2022

88838088-e20d-51ca-8c91-69194f5ae678